

解州全志卷之八 安邑縣

人物

夏

關龍逢夏大夫桀爲不道有諫者輒殺之龍逢進諫曰
君用財若無窮殺人若不勝民惟恐君後亡盍少悛
桀曰吾有天下猶天有日日亡吾乃亡耳不聽龍逢
立而不去桀殺之今安邑東北二里有塚明呂柟有
碑記祀鄉賢

漢

裴遵雲中人徙居安邑光武時爲燉煌太守從帝平蜀

有功至曾孫遼東將軍燭始遷聞喜傳二十七世生
晉公度祀鄉賢

閔貢字仲叔太原人世稱節士雖周黨之潔清自以爲
弗及也黨見其含蔬飲水遺以生蒜受而不食建武
中應司徒侯霸之辟旣至霸不及政事徒勞苦而已
仲叔恨曰始蒙嘉命且喜且懼今見明公喜懼皆去
以仲叔爲不足問耶不應辟也辟而不問是失人也
遂辭出投劾而去復以博士徵不至居安邑老病家
貧不能得肉日買猪肝一片屠者或不肯與安邑令
聞勅吏常給焉仲叔怪而問之知乃歎曰閔仲叔豈

以口累安邑耶遂去

魏

衛覬魏初拜侍中與王粲並典制度文帝踐祚封陽谷亭侯明帝時進閎鄉侯以文章顯好古文鳥篆隸草受詔典著作撰述至數千篇嘗爲魏官儀及請置律博士轉相教授事遂施行

晉

衛瓘之子性至孝襲父爵閎鄉侯拜侍中鄧艾鍾會之入蜀也瓘持節監軍會懷異志欲令艾殺瓘因加艾罪故先勅瓘收艾遂發兵反瓘作檄宣告諸將攻

會殺之又襲斬艾於綿竹三造亭事平朝議封瓘固
辭不受後都督徐州諸軍事增封菑陽侯泰始初進
爵爲公加征東大將軍及都督幽州時幽東有務桓
西有力微並爲邊害瓘表立平州兼督之遂離間二
虜於是務桓降而力微以憂死太康初遷司空惠帝
爲太子質鈍不能親政事瓘每欲陳啟廢立而未敢
發後會晏凌雲臺瓘託醉因跪帝牀前曰此座可惜
賈后由是怨瓘楊駿素與瓘不平及執政累奏免瓘
位詔不許及駿誅以瓘錄尚書事加綠綬綬劔履上
殿入朝不趨給騎司馬瓘又贊奏遣諸王還藩楚王

瑋由是憾焉賈后又惡其方直遂謗瓘欲爲伊霍之事於是作手詔令楚王瑋等收瓘及其子恒嶽裔及孫九人同被害恒二子瓘玠在醫家得免

衛恒瓘子歷官黃門侍郎工草隸爲四體書勢與父同難贈長水校尉諡蘭陵正世子

衛瓘恒子襲瓘爵後改封江夏郡公懷帝初爲散騎侍郎

衛玠字叔寶恒子丰神秀異總角時乘羊車入市見者以爲玉人好談元理王澄每聞其言歎息絕倒仕晉爲太子洗馬後移家建業人士聞其名觀者如堵嘗

言人有不及可以情恕非意相干可以理遣故終身
不見喜怒之色祀鄉賢

衛展字道舒歷尚書郎南陽太守江州刺史詔有考子
證父或鞭父母問子所在展以爲恐傷正教並奏除
之元帝初爲廷尉上書宜復肉刑卒贈光祿大夫

南北朝

李紹伯邑人敦煌宋稚嘗師事之受諸經傳

見通志

閻元明有孝行太和五年除北隨郡太守以違親養泣
淚喪明悲號上訴請歸養一見其母目復明有司狀
聞詔表孝行復其家母亡服闋心喪不輟每忌日悲

動傍隣昆弟亦感而雍和百口同居祀鄉賢

白建齊武成帝時初入大丞相府任騎兵曹典文帳明
解書計爲同局所推河清三年突厥入境代忻二牧
悉是細馬合數萬匹在五臺山北栢谷中避賊賊退
勅建送馬定州付人養飼恐馬瘦違勅以便宜行事
戍馬無損建有力焉武平末歷位尙書特進侍中中
書令封高昌郡公贈司空

紐因性至孝居父母喪廬於墓側負土成墳廬前生麻
一株高丈許環圍合拱枝葉鬱茂嚴冬不改有鳥棲
其上因舉聲哭鳥卽悲鳴相應時人異之周武帝表

其間擢授甘棠令祀鄉賢

隋

紐士雄因子質直孝友父歿亦廬墓側負土成墳庭前
有一槐甚茂及士雄居喪樹遂枯服闋還宅槐復榮
文帝聞之歎其父子至孝下詔褒美號所居爲累德
里祀鄉賢

郭絢家素寒初爲尙書令史後以軍功拜儀同歷數州
司馬長史皆以能名大業初刑部尙書宇文弼巡省
河北引爲副煬帝有事於遼東以涿郡爲衝要拜爲
涿郡贊務吏民悅服與柳儉等同以清名受賜帛數

載遷爲通守山東盜起絢逐捕多剋獲涿郡獨全後
擊竇建德於河間戰死吏民哭之數月不輟祀鄉賢
唐

張志寬居父喪哀毀閭里稱之王君廓兵略地不犯其
廬賴全者百許姓後爲里正于縣一日稱母疾急求
歸令問狀對曰母有疾志寬輒病是以知之令謂其
妄繫於獄馳驗如其言乃慰遣之母終負土成墳廬
於墓側唐高祖遣使者就弔拜員外郎散騎常侍表
其門閭祀鄉賢

曲環邑人客居隴右少喜兵法勇敢善騎射天寶大歷

中累立戰功德宗初威名益振賜名馬遷開府儀同
三司封晉昌郡王邠隴兵馬使李希烈陷汴州環斬
賊三萬五千級進檢校工部尙書兼陳州刺史希烈
平改陳許節度賜封三百戶環勤身節用寬賦歛簡
條教不三歲歸者襁至訓農治兵穀食豐衍轉檢校
尙書左僕射卒贈司空

曹文行孫懷應相里志降楊王操邵元同張衡曹存勲
李文褒董文海李文秀張僊兒張公憲皆事親居喪
著至行任君義衛開皆數世同居天子旌表門閭賜
粟帛州縣存問復賦稅有授以官職者

見唐書

金

劉祖謙字光甫承安五年進士歷州縣有政迹拜監察御史以鯁直稱正大初爲右司都事除武勝軍節度副使召爲翰林修撰家多藏書金石遺文略備父東軒工畫故祖謙以鑒裁自名信筆作簡牘尤可觀一時名士如雷淵李獻能王渥皆遊其門得人一詩可傳必殷勤稱道惟恐不聞人以此稱之子敏仲

劉從謙以明經擢進士太和元年爲萬泉主簿寬猛相濟條教可觀嘗罄俸資修廟學儒業復興祀萬泉名

宦

元

王邇平陽人隱居安邑博通經史尤精於易春秋上憲累薦不就述周四王年譜傳於世其他文集經兵燹無存年七十有八而終葬條陰之阜

明

劉復禮洪武間兄復初里選中人才時兄未有嗣復禮願代往授沂水邑丞令干紀丞坐失舉罪曰爲臣若此何以自白且如後代何遂不食卒七世孫澤商於淮有負貲累千金者貧無以償遂焚券

杜佑以戶部尙書范敏之薦爲四輔官佑主春官兼攝

秋冬禮遇與杜徵同嘗三主本省布政司鄉試稱得人

李祐洪武十三年以儒士授四輔官兼太子賓客侍食殿廷賜衣三襲後以老致仕

張斌永樂間北征募三河壯士其兄當遣斌曰兄老矣且無嗣此行能生還乎吾幸有子又膂力壯乃毅然代往窮絕塞而還論扈駕功授錦衣衛百戶辭歸養親而兄亦有子矣後斌子佑孫璉璉輩累世貴顯

李輅由江寧邑庠中庚子應天舉人辛丑成進士官至山東布政司右布政學士曾鶴齡嘗稱其爲政清而

溫惠而直廉而不激寬而不縱祀鄉賢

李素宣德庚戌進士以戶科給事中累官通政司右通政剛直有爲敷奏詳雅宦官馬順恃寵而驕素當御前力斥其姦英廟異之卒朝廷遣官諭祭祀鄉賢

張琦正統舉人高陵知縣廉正著聞恒以孝弟教民及寢疾且革縣丞憐其貧欲以庫銀餘耗爲贈琦却之曰吾家蓄有書置有田子孫自可耕讀言訖而卒子岫成進士累官都憲詳運志

張璉運庠生天順甲申進士爲御史風采凜然出守大名府調黎平有政績詳運志

李景泰丙子舉人受學于薛瑄蘭州周蕙嘗從景學
學益邃官清水教諭學使者歎其賢薦景代己命未
下卒

張岫運庠生成化間進士歷官遼東巡撫清操勁節爲
時所稱詳運志

張璲運庠生成化己丑進士歷官太僕寺少卿樹清望
多建白子棻宏治壬子經魁歷官陝西僉事蔓以舉
人官至辰州府知府俱詳運志

曹光華陰令陝西通志云明爽平易愛民如子有德政
碑詳運志

張芮運庠生成化己丑進士官至南京太常卿敦尙氣節不媚權閹詳運志

郭崧成化十三年運庠舉人令韓城陞同知詳運志

郝芹宏治間舉人山東館陶令廉而有爲擢順天府推官剛直不屈辭官歸里

劉鑑烈婦李氏孫輸穀得官宏治四年母病篤鑑凜雪其體籲天請禱云吾母疾甚吾割肝救療死無憾乃割肝一葉令妻作羹進母母食病頓愈鑑亦無恙母壽又逾二紀七十二而卒士紳歌頌成卷七世孫劉光祖貧無卓錫此卷猶存觀者感歎

謝譽由運庠中宏治戊午舉人歷官泰安知州有清節
祀名宦詳運志

祁鶴運庠生正德甲戌進士官至山東按察司副使居
官清慎詳運志

相世芳運庠生正德間進士官至刑部郎中忠義性成
抗疏被廷杖詳運志

謝誥運庠生正德丁丑進士官至戶部員外性狷介裕
幹畧詳運志

胡諧正德庚午舉人官至雲南叅議一塵不溜剛毅有
守同知温州時柄相子慕友妻艷而沉其友無敢受